

Broj: 03-19-304/2025
Sarajevo, 09.07.2025. godine

**PARLAMENT FEDERACIJE
BOSNE I HERCEGOVINE**

- Predstavnički dom -
gosp. Dragan Mioković, predsjedavajući
- Dom naroda - ✓
gosp. Tomislav Martinović, predsjedavajući

Bosna i Hercegovina
Federacija Bosne i Hercegovine
**PARLAMENT FEDERACIJE
SARAJEVO**

Primljeno: 11-07-2025

Org. jed.	Broj	Priloga	Vrijednost
01,02	-19-	1469	125

Poštovani,

U skladu sa članom 23. stav (1) Zakona o prostornom planiranju i korištenju zemljišta na nivou Federacije Bosne i Hercegovine („Službene novine Federacije BiH“, br. 2/06, 72/07, 32/08, 4/10, 13/10, 45/10, 85/21, 92/21 i 72/24), a u vezi sa članom 206. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i članom 203. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09, 24/20 i 60/24), radi razmatranja i donošenja, dostavljam Vam **PRIJEDLOG ODLUKE O PRISTUPANJU IZRADI PROSTORNOG PLANA FEDERACIJE BOSNE I HERCEGOVINE**, koji je utvrdila Vlada Federacije Bosne i Hercegovine na 58. sjednici, održanoj 09.07.2025. godine.

Prijedlog odluke se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,



Prilog: Prijedlog odluke na bosanskom jeziku (CD)

Co: Federalno ministarstvo prostornog uređenja
gosp. Željko Nedić, ministar

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ODLUKA
O PRISTUPANJU IZRADI PROSTORNOG PLANA FEDERACIJE BOSNE I
HERCEGOVINE**

Sarajevo, juli 2025. godine

Na osnovu člana 23. stav (1) Zakona o prostornom planiranju i korištenju zemljišta na nivou Federacije Bosne i Hercegovine ("Službene novine Federacije BiH", br. 2/06, 72/07, 32/08, 4/10, 13/10, 45/10, 85/21, 92/21 i 72/24), Predstavnički dom Parlamenta Federacije Bosne i Hercegovine na _____ sjednici održanoj _____ godine i Dom naroda Parlamenta Federacije Bosne i Hercegovine na _____ sjednici održanoj _____ godine d o n o s i

ODLUKU O PRISTUPANJU IZRADI PROSTORNOG PLANA FEDERACIJE BOSNE I HERCEGOVINE

Član 1. (Vrsta dokumenta čijoj se izradi pristupa)

Pristupa se izradi Prostornog plana Federacije Bosne i Hercegovine (u daljem tekstu: Prostorni plan Federacije).

Član 2. (Područje za koje se plan izrađuje)

Prostorni plan Federacije se izrađuje za područje Federacije Bosne i Hercegovine.

Član 3. (Period za koji se planski dokument donosi)

Prostorni plan Federacije se donosi na period od 20 godina od dana donošenja.

Član 4. (Smjernice za izradu planskog dokumenta)

- (1) Prostorni plan Federacije određuje dugoročne ciljeve i mjere prostornog razvoja u skladu sa planiranim ukupnim privrednim, društvenim i historijskim razvojem od značaja za Federaciju, a naročito utvrđuje područja i objekte od značaja za Federaciju kao što su:
 - objekti i trase privredne (magistralne) infrastrukture od međunarodnog, državnog i federalnog značaja kao i interes dvaju ili više susjednih kantona (cestovna, vodoprivredna, energetska, telekomunikacijska i druga infrastruktura sa objektima);
 - objekti i područja graditeljskog ili prirodnog naslijeđa utvrđeni od strane Komisije za očuvanje nacionalnih spomenika kao nacionalni spomenici;
 - područja od značaja za Federaciju BiH (područje hidroenergetskih građevina, područja hidroakumulacija za potrebe regionalnog snadbjevanja

vodom, međunarodni aerodromi, međunarodne luke, područja koja imaju izrazit prirodni značaj).

- objekti i prostori od značaja za odbranu.

- (2) U Prostorni plan Federacije se unosi postojeće stanje, planska rješenja bazirana na analizi potreba, usaglašeni planovi i strategije pojedinih resora i planski dokumenti kantona.

Član 5.

(Način osiguranja sredstava za izradu)

Sredstva za izradu Prostornog plana Federacije osiguravaju se u Budžetu Federacije Bosne i Hercegovine.

Član 6.

(Nosilac pripreme za izradu planskog dokumenta)

Nosilac pripreme za izradu Prostornog plana Federacije je Federalno ministarstvo prostornog uređenja (u daljem tekstu: Nosilac pripreme).

Član 7.

(Odredbe o javnoj raspravi)

- (1) Nosilac pripreme je dužan, u skladu sa zakonom i drugim važećim propisima, osigurati učešće zainteresovane javnosti, u fazi pripreme i zainteresovane i šire javnosti u svim fazama izrade počevši od prednacrt.
- (2) Kroz uključenje javnosti, Nosilac pripreme će osigurati saradnju i usaglašavanje stavova sa svim subjektima planiranja i drugim zainteresovanim osobama na području Federacije Bosne i Hercegovine, a naročito sa vlasnicima nekretnina, nosiocima prava raspolaganja i korištenja dijelova područja i objekata, uključujući međuentitetsku i međudržavnu saradnju na kontaktnom području.
- (3) Posebnu saradnju i usaglašavanje stavova, Nosilac pripreme će osigurati sa odgovarajućim organima i organizacijama kantona.

Član 8.

(Izbor Nosioca izrade planskog dokumenta)

Izbor Nosioca izrade Prostornog plana Federacije (u daljem tekstu: Nosilac izrade), izvršiti će Nosilac pripreme u skladu sa odredbama Zakona o javnim nabavkama („Službeni glasnik BiH”, br. 39/14 i 59/22).

Član 9.
(Rok izrade)

- (1) Rok za izradu Prostornog plana Federacije je 18 mjeseci od potpisivanja ugovora za njegovu izradu, a isti se odnosi na obaveze Nosioca izrade Prostornog plana Federacije.
- (2) U rok ne ulazi vrijeme potrebno za pregled pojedinih faza izrade Prostornog plana Federacije od strane Nosioca pripreme, utvrđivanje od strane Vlade Federacije Bosne i Hercegovine i njihovo usvajanje u parlamentanoj proceduri.

Član 10.
(Drugi elementi i odredbe)

- (1) Federalni, kantonalni i općinski organi i organizacije, nadležni za oblasti od značaja za uređenje i korištenje prostora, a posebno nadležni za promet, komunikacije, poljoprivredu, šumarstvo, vodoprivredu, rudarstvo, energetiku, industriju, nauku, kulturu, obrazovanje, zdravstvo, turizam, zaštitu kulturno-historijskog i prirodnog naslijeđa, zaštitu okoliša, kao i organizacije koje raspolažu statističkim podacima koji se prikupljaju na nivou Federacije Bosne i Hercegovine, dužni su Nosiocu pripreme za izradu Prostornog plana Federacije, staviti na raspolaganje sve informacije, strategije, planove, programe i druge podatke o prostoru sa kojima raspolažu.
- (2) Izuzev naknade troškova umnožavanja materijala, pravo na naknadu za davanje potrebnih informacija i dokumenata, nemaju korisnici sredstava iz budžeta.

Član 11.
(Stručno praćenje i usmjeravanje izrade plana)

- (1) Za potrebe stručne zasnovanosti i usaglašavanja stavova kroz izradu prednacrt, nacrt i prijedloga Prostornog plana Federacije, Nosioc pripreme će formirati Savjet plana (u daljem tekstu: Savjet).
- (2) Savjet će biti sastavljen od predstavnika Nosioca pripreme, relevantnih federalnih ministarstava, predstavnika kantona, kantonalnih zavoda, javnih preduzeća, kao i drugih stručnih lica za ovu oblast.
- (3) Savjet pomaže Nosiocu pripreme plana kroz davanje mišljenja i sugestija i ima savjetodavnu ulogu.

Član 12.
(Stupanje na snagu)

Ova odluka stupa na snagu narednog dana od dana objavljivanja u "Službenim novinama Federacije BiH".

OBRAZLOŽENJE
PRIJEDLOGA ODLUKE O PRISTUPANJU IZRADI PROSTORNOG PLANA
FEDERACIJE BOSNE I HERCEGOVINE

I ZAKONSKI OSNOV

Zakonski osnov za donošenje Odluke o pristupanju izradi Prostornog plana Federacije Bosne i Hercegovine sadržan je u odredbi člana 23. stav (1) Zakona o prostornom planiranju i korištenju zemljišta na nivou Federacije Bosne i Hercegovine („Službene novine Federacije BiH“, br. 2/06, 72/07, 32/08, 4/10, 13/10, 45/10, 85/21, 92/21 i 72/24) (u daljem tekstu: Zakon), kojom je utvrđeno da Parlament Federacije Bosne i Hercegovine donosi Odluku o pristupanju izradi planskog dokumenta iz nadležnosti Federacije BiH.

II RAZLOZI ZA DONOŠENJE OVE ODLUKE

Vlada Federacije Bosne i Hercegovine je na 47. sjednici, održanoj 13.02.2025. godine, donijela zaključak kojim se Federalno ministarstvo prostornog uređenja zadužuje da pokrene proceduru u cilju donošenja novog Prostornog plana Federacije Bosne i Hercegovine.

III OBRAZLOŽENJE PRAVNIH RJEŠENJA PREDLOŽENIH U OVOJ ODLUCI

Članom 1. Odluke definisano je da se pristupa izradi Prostornog plana Federacije Bosne i Hercegovine. Članom 23. stav (2) propisan je sadržaj Odluke o pristupanju izradi planskog dokumenta. Tačkom 1) naprijed navedenog člana propisana je obaveza definisanja vrste dokumenta čijoj se izradi pristupa, na osnovu čega je definisana odredba člana 1. Odluke.

Članom 2. Odluke o pristupanju izradi Prostornog plana Federacije BiH, navedeno je područje za koje se Prostorni plan Federacije radi, a što je usklađeno sa članom 23. stav (2) tačka 2) Zakona.

Članom 3. Odluke o pristupanju izradi Prostornog plana Federacije BiH, definiše se, u skladu sa članom 23. stav (2) tačka 3) Zakona, planski period za koji se plan radi.

Članom 4. Odluke o pristupanju izradi Prostornog plana Federacije BiH, u skladu sa članom 23. stav (2) tačka 4) Zakona, date su smjernice za izradu Prostornog plana Federacije BiH, čiji je sadržaj propisan članom 9. Zakona i koji je zasnovan na postojećem stanju u prostoru Federacije Bosne i Hercegovine.

Članom 5. Odluke o pristupanju izradi Prostornog plana Federacije BiH, u skladu sa članom 23. stav (2) tačka 6) Zakona, definiše se način osiguranja sredstava za izradu plana. Članom 13. stav (3) Zakona propisano je da se ista osiguravaju u budžetu Federacije.

Članom 6. Odluke o pristupanju izradi Prostornog plana Federacije BiH, u skladu sa članom 23. stav (2) tačka 8) Zakona, određuje se Nosilac pripreme za izradu Prostornog plana Federacije BiH. Član 6. ove odluke zasnovan je na odredbi člana 24. st. (1) i (2) Zakona.

Član 7. Odluke o pristupanju izradi Prostornog plana Federacije BiH, u skladu sa članom 23. stav (2) tačka 7) Zakona, donosi odredbe o javnoj raspravi, odnosno o uključenju javnosti u proceduri izrade i donošenja Prostornog plana Federacije BiH, druge obaveze u pogledu usaglašavanja stavova i interesa propisane zakonom, uredbom i drugim propisima koji se odnose na uključenja javnosti, a posebno propisima iz oblasti zaštite okoliša, odnosno obaveze provedbe Strateške procjene.

Članom 8. Odluke o pristupanju izradi Prostornog plana Federacije BiH, u skladu sa članom 23. stav (2) tačka 9) Zakona, definiše se izbor Nosioca izrade Prostornog plana Federacije BiH. Članom 26. stav (1) Zakona propisano je da se izrada planskog dokumenta može povjeriti pravnom licu registrovanom za obavljanje poslova izrade planskih dokumenata. Članom 26. stav (2) Zakona propisano je da izbor Nosioca izrade planskog dokumenta vrši Nosilac pripreme za izradu planskog dokumenta (Ministarstvo) u skladu sa Zakonom o javnim nabavkama Bosne i Hercegovine.

Članom 9. Odluke o pristupanju izradi Prostornog plana Federacije BiH, u skladu sa članom 23. stav (2) tačka 5) Zakona, određuje se rok za izradu prostornog plana sa preciziranjem na šta se isti odnosi, odnosno ne odnosi.

Članom 10. Odluke o pristupanju izradi Prostornog plana Federacije BiH, u skladu sa članom 23. stav (2) tačka 10) Zakona, definisani su drugi elementi bitni za proceduru izrade prostornog plana, a posebno obaveze koje proizilaze i odredbi člana 25. st. (1), (2), (3) i (4) Zakona.

Članom 11. Odluke o pristupanju izradi Prostornog plana Federacije BiH, u skladu sa članom 25. stav (5) Zakona, određeno je da će Nosilac pripreme za izradu Prostornog plana Federacije BiH, formirati Savjet plana kao i ko će činiti njegov sastav.

Član 12. Odluke o pristupanju izradi Prostornog plana Federacije BiH, u skladu sa članom 23. stav (5) Zakona, određuje da se Odluka o pristupanju izradi Prostornog plana Federacije BiH objavljuje u „Službenim novinama Federacije BiH“ i kada stupa na snagu.

IV FINANSIJSKA SREDSTVA

Za donošenje Odluke o pristupanju izradi Prostornog plana Federacije Bosne i Hercegovine nije potrebno obezbjeđivati finansijska sredstva.